



PNTL

REVISTA

13

Polísia Nasionál Timor-Leste
Ita nia Polísia 2016

Editorial**Mensagen**

Discurso Primeiro-Ministro PNTL aniversário 16

PNTL Mini Museum**SEFI** apresenta Relatori **Diagnostiku Ba PNTL**Aniversáriu **PNTL** XVI Fó Kondekorasaun ba ex Komisáriu**Estatístiku** Nasional **Insidente** no **Tránzitu** 2016**PNTL** Iha **asaun****UEP** estabelese Peltaun **Anti Terrorista****Komando** entrega motorizada ba membru **OPS****PNTL** Dezenvolvimentu **Sistema Jestaun Insidente**Kazerna **PNTL** Ermera no Oecusse **Inagura****Aniversariu UPF** 13 hametin disciplina **fronteira****Povu** Timor-Leste %64 Tau **Konfiansa Ba PNTL****PNTL** Organiza Resensiamentu **Eleitoral** iha **Uaibobo**Seminariu **Kombate Krime**Ajente Rekruta **PNTL 259** Simu **Graduasaun****REVISTA PNTL****Responsavel Jerál**Komandante Jerál PNTL
Komisáriu Julio da Costa Hornay**Diretor**Komandante Relasaun Pública PNTL
Insp. Xefe Honorio Assis Barreto**Hoordenador**

Insp. Francisco Martins

Editor

Lindalva de Deus Belo Assis

Jornalista

Victoria Maia de Jesus

Grafismu

Ajt. Estevão Pereira

FotografiaAjt. Tomas Maia Rodrigues
Ajt. Jeremias dos Santos
Ajt. Estevão Pereira
Ajt. Melquiades do Nascimento**Sekretariádu**

Ajt. Melquiades do Nascimento

Relasaun Pública no Midia PNTL

Rua Jacinto Cândido - Caicoli - Dili

Website: www.pntl.tlEmail: koaliaho@pntl.tl

Nú. Kontaktu: 77 312 433

77 394 446

77 325 881

sumário
13

Ba le'e na'in sira mak ami respeita, iha edisaun bida ne'e ami hakarak partilla hela informasaun balun relasiona ho komemorasaun aniversáriu Polisia Nasional Timor Leste (PNTL) nian ba dala XVI iha Ioron 27 Marsu 2016. Iha serimonia aniversáriu ne'e, Presidente da Repùblika fó Kondekorasaun Medalha da Ordem de Timor-Leste ba Ministru Interior Dr. Longuinhos Monteiro no Komisariu Polisia Afonso de Jesus ba sira nia dedikasaun durante assume sira nia mandatu hanesan Komandante Jerál no Segundu Komandante Jerál PNTL.

Komandu PNTL iha selebrasau Ioron moris nian, halo mós promosaun ba nia membrus sira husi Ajente Príncipal ba Ajente Xefé no Sarjentu

ba Primeiru Sarjentu. No fó Kondekorasaun ba eis Komandante Jerál no 2º Komandante Jerál, Kondekorasaun ba Instituisaun no pessoal ne'ebé maka fó sira nia kontribuisaun ba desenvolvimentu Instituisaun PNTL. Kondekorasaun hirak ne'e maka hanesan: Medalha de Mérito de Segurança, Medalha de Comportamento Exemplar Grau Prata, Medalha Comemorativa de Comissão Serviço Especial : Guiné-Bissau 2014/2015.

Iha edisaun ne'e, ekipa Relasaun Pública PNTL hatutan mós informasaun balun kona-ba vizita servisu Segundu Komandante Jerál iha munisiyu sira no halo Promosaun ba membrus PNTL tuir Antiguidade.

Tinan 2016 Unidade Patrullamento Fronteira (UPF) celebra ninia aniversáriu ba XIII iha Ioron 30 Setembru no iha revista ne'e ami oferece tan informasaun balun relasiona ho komemorasaun aniversariu refere.

Nafatin aktualiza Estatística kona-ba Krime no Asidente Tráfiku ne'ebé akontese kada fulan, atu nune'e le'e nai'in sira bele akompaña hodi evita atu labele mosu tan asidente hanesan iha futuru.

Karik iha ideas, kritikas no sujestaun husi maluk le'e nain sira, ami prontu atu simu hodi hadia diak liu tan revista PNTL nian iha futuru.

Obrigadu barak.

Inspektór Xefe **Polisia Honório A. Barreto**
Xefe Relasaun Pública PNTL

Foto kapa

Primeiro Ministro fo Kondekorasaun Ordem de Timor-Leste ba eis Komandante Jerál PNTL Dr Longuinhos Monteiro

Comemoração 16.º Aniversário **PNTL** **27 Março 2016**

Ami sente onradu tama ita bo'ot sira bele hamutuk ho ami iha akontesimentu ne'ebe markante tebes iha ami nia historia. Hau hodi naran Polisia no sivis sira ne'ebe halo parte iha familia bo'ot Polisia Nasional Timor-Leste ba imi hotu hau kumprimenta ho respeitu no amizade, hato'o apressu bo'ot ne'ebe ami rejista, prezensa ita bo'ot sira nia disponibilidade hodi mai hamutuk ho ami celebra loron festivu Instituisaun PNTL nian ba dala 16.

Desde PNTL moris, mantein fiel ba prinsipi ida, hanesan FORSA SEGURANSA ne'ebe ho nia estratézia no filozofia Polisiamenti, reune nia karakteristika Polisia komunitaria, enkuantu nia organizasaun, disciplina, instrusaun no estatutu pessoal, assume natureza ida identika militar, maibé laos militar.

PNTL ho nia kompetensia jenerika iha territoriu nacional tomak no nu'udar forsa seguransa ida ne'ebe nia misaun defende legalidade demokratika, garante seguransa ema nian no bens, no salvaguarda direitu sidadaun nian, tuir buat ne'ebe hatur iha Konstituisaun da Repúblika no leis sira.

Liu tiha tinan 16 desde nia hari'i, ho tempu ne'ebe liu dadaun ita mós hasoru nesesidade mudansa seguransa nian, ho nune'e ita reformula diplomas estrutura ba organizasaun, hanessan Lei Organika, Regulamento Disiplinar no Rejime ba Promosaun.

Iha tinan ida liu ba, iha fatin ida ne'e mais ou menus oras hanessan, ita halo serimonia selebrasau hanesan ohin, liu hosi nomeasaun Governo, ho honra no orgullu bo'ot, hau ho hau nia Segundu simu posse hanessan Comandante-Geral no 20 Comandante Geral

Liu tiha tinan ida, ami bele dehan katak iha dezafiu lobun ida ne'ebe ami nain 2 atravesa wainhira komanda membrus Polisia nain 3812 iha PNTL, maibé ami orgullu tama ita apoio maksimu husi efektivus tomak, inklui orgauns servisu sira seluk, tantu Nasional no Internasional.

PNTL iha nia orjen, opta modelu ida ne'ebe fó possibilidade no vantajen, konsegue koloka iha territoriu laran tomak tuir nesesidade seguransa ba povu no estadu Timor Leste. Ninia organijasaun no disciplina militar ho deveres jerais patentes iha Regulamento Disiplinar fó ba Instituisaun ho possibilidade hodi hakbi'it efikasia no moderniza an, maibé kaer metin nafatin nia marka jenetika no nia karakteristika.

Ida ne'e maka ninia karakter em partikular no disponibilidade sentido de dever, ne'ebe permiti atu garante seguransa ho espassu efisiensiа hodi ultrapassa difikuldades ne'ebe hasoru. Ne'e, maka lao iha passadu no sei hanesan ne'e ba oin, tama kapasidade PNTL afirma nia a'an hanesan Força Seguransa ne'ebe sei lao tuir servisu ne'ebe nia rekursus, mane no feto sira halo ho sira nia espiritu de missaun no dedikasaun bo'ot ba publiku.

Hala'o misaun ida ne'e, liu-liu Polisia sira ne'ebe servisu no kontaktu diretua ho populasaun iha eskuadra 65, hodi asegura relasaun hakbesik-an ba komunidade ne'ebe sira hela ba, no hare'e ba sira nia problemas ke dala ruma aktua liu tia nia kompetensia hanesan autoridade. Ita nia Polisia espesializadus sira mós dezenvolve asaun investigasau kriminal, hodi prevene no kombat kriminalidade violentu no grave, hasoru mudansa situasaun ordem pública hodi kontribui ba redusaun dezastre iha ita nia estradas, no kolabora ho instituisaun seluk iha aksaun ida ne'e.

Objetivu Estratéjiku PNTL hodi atinji indikador ba seguransa pública no koko introduz ba Polisiamenti komunitari liu hosi Visibilidade, Involvimento no Profisionalismu (V.I.P) ida ne'e to'o ohin loron númeru ofisiais Polisia suku atinji ona 442 ba 442 sukus ne'ebe existi iha Timor Leste.

Asidente rodoviario ohin loron sai fatór kritiku prinsipal ba insecuransa iha ita nia rai. Tuir dadus asidentes iha tinan 2015 resulta mate ema nain 89, kanek todan nain 413 no kanek kaman nain 1392 husi total 1664 asidentes. Kauza husi asidentes hirak ne'e makas liu mai husi fatór umanu.

Atu reduz no minimiza asidentes hirak ne'e maka planu ba 2016 Komandu PNTL sei hasa'e volume operasaun cek point ba sirkualsaun viaturas publikus, privadus no Guvernu ne'ebe utiliza viaturas la tuir lei tránzito rodoviario nia tantu iha kapital no mós munisipius no prepara proposta alterasaun ba lejislausaun.

Komando rekoñese difikuldades hirak ne'ebe imi enfrenta iha imi nia servisu, maibé hanesan imi nia Komandante Jerál hau hakarak apela ba imi hotu atu labele utiliza difikuldades hirak ne'e hanesan obstáculo ba imi, atu imi hala'o imi nia kna'ar. Mantein nafatin imi nia firmeza hodi serve ita nia povu ho sentimentu hanesan nain ba rai ida ne'e, no hateten ba imi nia an ida por ida katak, se laos hau se fali no se laos ohin wainhira fali, hodi banati tuir saida maka ita nia asuain sira hatudu ona ba ita iha prosesu luta durante tian 24. Mezmu ke buat hotu laiha maibé tama ho vontade bo'ot no hakarak sai duni nain ba rai ida ne'e maka sira prontu sakrifika sira nia an no prontu fakar sira ran hodi liberta ita nia rai ida ne'e.

Atu hakotu hau nia intervensaun ida ne'e hodi reafirma ba Vossa Excelencia hau nia konvisaun katak PNTL feto no mane kontinua garante servisu ho kualidade ba ita nia sidadaun sira hodi kontribui ba paz no liberdade iha teritorio tomak.

Fiar metin katak buat ne'ebe ami halo ona no sei halo nafatin hodi servi povu Timor-Leste, resta deit atu agradese ba membrus PNTL tama sira nia empeñu no profesionalizmu, maka hodi hetan resultadu sira ne'e, no mós la haluha hato'o obrigadu wain ba apoiu no kolaborasaun hosi orgauns no autoridade governu, nomeademente exelencia Ministro Interior ne'ebe fó apoio maka'as ba progresu desenvolvimentu PNTL.



Obrigadu!

Komisáriu Polisia **Júlio da Costa Hornay, SIP, MAP.**
Komandante Jeral Polisia Nasional Timor-Leste



Discurso Primeiro-Ministro da República Democrática de Timor-Leste, DR. Rui Maria de Araújo, por ocasião do 16º aniversário da Polícia Nacional de Timor-Leste

Photo: Melquiades do Nascimento/PNTL

ta ohin halibur hamutuk iha ne'e, atu selebra tan tinan ida Ezistensia Polisia Nasional Timor-Leste ne'ebe orseik, dia 27 Marsu 2016, kompleta tinan 16, iha loran ne'ebe sarani katoliku iha mundu tomak selebra mós Nai Jesus Kristu nina moris hias. Tamba ne'e, no tambo mós buat hotu-hotu ne'ebe PNTL hala'o tiha ona iha tinan sanulu-resin-neen nia laran, hodi Governu tomak nia naran, hakarak hato'o Paskoa Kmanek ida ba membru PNTL tomak, no Parabéns ba imi nia loran aniversáriu PNTL. Parabéns ba instituisaun ne'e rasik, no ba ema hotu ne'ebe hola parte iha instituisaun ne'e nia laran, hahu'u husi Komandante Jerál, órgaun assessorial no inspesaun nian, hanesan Konsellu Superior Polisia, no Inspesaun-Jerál, Komandu-Jerál, Unidades no Servisu oin-oin no mós Sentru Formasaun Polisia.

Hau hakarak aproveita mós biban ida ne'e, atu dala ida tan hato'o iha públiku, lufuan agradesimentu ba Ministru Interior, Dr. Longuinhos Monteiro no ba Señor Komisariu Afonso de Jesus, ne'ebe foin hetan investidura ho medalla Ordem Timor-Leste nian, nu'udar kondekorasaun husi Prezidente da Repúblíka. Ita bo'ot nain rua nia dezempeñu, espíritu misaun, dedikasaun no profisionalizmu nu'udar Komandante-Jerál PNTL, kna'ar ne'ebe iha responsabilidade bo'ot tebes, fó ona kontinuidade hodi kumpri propózitu PNTL nian, hodi tau matan ho responsabilidade bo'ot ba ema hotu- ba nasau, ba populaun no ba Instituisaun-hodi halo mós instituisaun ne'e sai dezenvolvidu no metin liu tan.

Hanesan ita hotu hatene, Polisia Nasional Timor-Leste iha papel fundamental iha prosesu hatúr orden no proteje timor-oan sira, sidadaun ein jerál, no estadu rasik, iha nível hotu-hotu. Ezersiu kompeténsia hirak ne'e, esensial tebes

hodi bele hari'i Estadu Demokrátiku ida, no tanba ne'e maka fundamental mós, prosesu reforma institusional ne'ebe hala'o tiha ona no sei hala'o nafatin prosesu ida ne'ebe maske la'os lais, no la'os mós fasil, produz dadaun ona rezultadu, hodi nune'e, ohin loran Timor-Leste bele moris iha klima ida ho dame no hakmatek.

Kada tinan ne'ebe liu, no ita hakat liu ona tinan sanulu-resin-neen, PNTL buras no hakbi'it nina kapasidade ba bebeik, atu bele ezerse ninia funsaun, no assume kompeténsia barak liu tan iha área oin-oin, dala balun iha área ne'ebe relasiona ho direitu, liberdade no garantia ba sidadaun sira, dala seluk fali, relasiona ho seguransa Paiz nian. Ita presiza rekoñiese katak PNTL konsegue ultrapassa ona fragilidade lubun ida, no konsegue aperfeisoa nia-a'an, hodi mós konsegue halo diak liu tan planeamentu no administrasaun ba rekursu, iha misaun oin-oin, ho objetivu atu serbi ita populasaun no ita nia Pátria.

PNTL iha funsaun atu kontrola, hodi prevene no kombate hasoru krime, prezerva orden públika, hodi halo ema bele kumpri lei no asegura kondisaun seguransa ne'ebe bele garante funsionamentu normal instituisaun demokrátiku sira. Nia iha mós funsaun atu próteje sosiedade, hodi atende, fó assisténsia no defende ema hirak ne'ebe presija. PNTL mós maka defende direitus umanus ema timor-oan millaun ida resin, no mós sidadaun sira seluk ne'ebe moris iha Timor-Leste.

PNTL la halo paktu ho hahalok-a'at babeur nian sira, ne'ebe bele hakanek sosiedade no Estadu. Tanba ida ne'e, ita hotu presiza valoriza attitude ida ne'e. Ita presiza entende katak PNTL nina atuasaun, hamutuk ho instituisaun seluk ne'ebe

proteze Estadu, direitus umanus no sosiedade, iha relasaun ho ita hotu no ita idak-idak, no sira hala'o kna'ar ida ne'e, ba ema hotu nia bem-estar, no ba ita nia Paiz nina seguransa.

Tanba ne'e, importante atu ita konsiénte katak bem-estar no seguransa sai nu'udar sidadaun nina direitu, maibé mós sai nu'udar dever ida sidadaun hotu-hotu nian. Komunidade presiza partisipa, liu husi buat ne'ebe ita hotu hatene nu'udar Polisiamentu komunitariu, atu nune'e forsa seguransa sira bele produz resultadu ne'ebe diak, iha bem-estar no seguransa Paiz nian.

Hau fó hanoin hikas fali katak iha tinan kotuk, iha aniversariu dala sanulu-resin-lima, iha duni fatin ida ne'e, hau apela ba konsentrasaun bo'ot liu-tan iha área Polisiamentu komunitáriu, kontrolu fronteira terrestre no maritime, no seguransa rodoviária. Tinan ida liu-tiha, buat balun konsegue halo ona, maibé mós buat lubun ida sei hein hela atu implementa. No ohin, hau hakarak reitera fali katak Komandu PNTL tenki nafatin orienta esforsu tomak atu hametin liu tan Polisiamentu iha área tolou ne'ebe hau foin temi dadaun.

Iha nina Planu Estratéjiku, PNTL hakarak hamosu modelu Polisiamentu VIP, katak "V" ba "Vizibilidade" polisia nian iha komunidade nia le'et, hodi nune'e komunidade bele sente seguru, no ema ne'ebe hanoin a'at, bele hanoin dala-rua ka dala barak liu, molok halo buat a'at-ruma; "I" ba "Involvimento" komunidade atu bele ita bele sente katak komunidade rasik sai parte husi sistema seguransa; no "P" ba "Profisionalizmu" polisia ninian, ne'e ita bele sukat husi komunidade nina satisfasaun, ka komunidade nina hanoin kona-ba PNTL rasik. Tamba ita sei iha hela ambiente Páskoa nian, mai ita halo "ezame konsiênsia" hodi husu ba ita idak-idak nia-a'an, se ita implementa duni ona modelu Polisiamentu VIP ne'ebe ka? Eh keta VIP ne'ebe ita idak-idak, ka ita balun implementa, sai fali Violentu ba "V", Invizivel ba "I" no Parsial ba "P". Hau fier katak ita hotu lakohi modelu Polisiamentu ida ne'ebe Violentu, Invizivel no Parsial.

Ho hanoin hirak ne'e, hau aproveita oportunidade mós atu dezafia Komandu-Jerál, Komandu Unidades, Komandu Servisu, no mós Komandu Munisipiu sira atu reforsa kapasidade subjektiva idak-idak nian atu komanda, katak, reforsa idak-idak ninaabilidade komandu nian, hodi implementa duni modelu Polisiamentu ida ne'ebe iha duni Vizibilidade, Involvimento no Profisionalizmu. Hau dezafia mós ofisiáis, sargentus no ajentes hotu-hotu, atu hatudu profisionalizmu bo'ot liu tan, iha ita bo'ot sira nia servisu loran-loran, liu husi disciplina, rigor, no izensaun iha ita bo'ot sira nia atuasaun Polisiamentu hotu-hotu.

Esforsu tomak ne'ebe PNTL hala'o hanesan instituisaun konsegue imprimi ona kredibilidade iha nível nasalional no internasional. Iha panorama mundial oras ne'e dadaun, no ho globalizasaun ameasa oin-oin, importante tebes atu nafatin transmite ba populaun no Paiz tomak, konfiansa iha ita nia politika seguransa nian. Se ita la halo ida ne'e, ita tau iha risku ambiente estável no seguru ne'ebe ita konsegue hamosu ona, estabilidade no seguransa ne'ebe lori ona bem-estar ba ita nia sidadaun sira, no lori mós imagem konfiansa liu-tan ba ita nia rain.

Keta haluha katak ita nia Paiz nina dezenvolvementu la'o hamutuk ho dezafiu foun oin-oin, ne'ebe asosiadu ho dezenvolvementu ne'ebe rasik, liu-liu iha ita nia relasaun ho Paiz sira seluk, no mós ho mundu tomak, no mós iha relasaun ho karáter konstrusaun Estadu no Nasaun, ne'ebe tenki nesesariamente liu husi prosesu demokrátiku. Molok PNTL kompleta tinan sanulu-resin-hitu iha tinan oin mai, (ka ema sei bolu sweet seventeen) ita sei hahu'u halo preparasaun ba eleisaun prezidencial no parlamentar. Faze ida ne'e, sei

sai mós dezafiu importante ida tebes ba disciplina, rigor no izensaun ofisiais, sarjentus no ajentes PNTL sira hotu.

Keta mós haluha katak seguransa nasional, ne'ebe nina parámetru evolui no modifika ba bebeik, sei nafatin sai hanesan ita nia objektivu ida bo'ot liu, no atu defende ida ne'e maka ita hotu- Estadu, Governu, no Força Defesa no Força Seguransa- hamutuk servisu hodi haka'as-an tuir Konstituisaun no Lei haruka.

PNTL ohin sai nu'udar instituisaun ho perkursu ne'ebe hatudu pasu bo'ot lubun ida, ne'ebe hala'o tiha ona hodi fortalese no konsolida nia-a'an, maibé mós sei nafatin sai nu'udar instituisaun ida ne'ebe sei presiza buras no sai forti liu tan. Rekursu Umanu ne'ebe sai nu'udar nina kbi'it, kapasidade liu tan ona, no iha koñesimentu ne'ebe di'ak liu tan, hodi kontribui ba instituisaun nina kresimentu.

Maibé sei presiza kontinua hala'o esforsu ida ne'e hodi hasa'e kapasidade sai ás liu tan. No presiza halo ida ne'e hodi labele tau ba kotuk disciplina, rigor no izensaun nu'udar sasukat ba dezempeñu profisional ne'ebe ita hotu tenki impoin ba ema hotu ne'ebe hetan konfiansa atu hala'o dever no responsabilidade importante hanesan dever no responsabilidade atu serbi Estadu ne'ebe PNTL mós hala'o. Ita idak-idak presiza kaer metin ba étika profisional, ho seriedade atu bele kumpri idak-idak nina obrigasaun. Tanba ne'e maka mós importante ba lideransa iha instituisaun ida hanesan PNTL, atu bele prepara didi'ak forsa ida ne'ebe unidu no firme, onradu, disciplinadu no bele responde ba ejijénsia hirak ne'ebe mosu loran-loran.

Maizomenus tinan ida liu-ba Komandante-Jerál PNTL, Komisariu Julio da Costa Hornay, no 2º Komandante-Jerál PNTL, Komisariu Faustino da Costa, sira nain rua simu kna'ar lideransa ka Komandu iha instituisaun ida ne'e. kna'ar hirak ne'e lori responsabilidade, ejijénsia bo'ot, no presiza iha kompeténsia profisional, liu-liu presija iha disciplina, presija iha rigor no izensaun. Hau reitera votus susesu iha ita bo'ot nain rua nia kna'ar.

Tinan ida liu-ba, iha fatin hanesan, hau rekoñese espiritu esforsu no sakrifisiu membru hotu-hotu PNTL nian, no hau afirma iha ita bo'ot sira hotu nia oin, Governu nia konfiansa iha instituisaun ida ne'e.

Ohin liu tiha tinan ida, hau hamri'ik fali iha ne'e, atu rekoñese nafatin espiritu esforsu no sakrifisiu husi ofisiais, sarjentus no ajente sira hotu, no reitera hikas governu nina konfiansa iha ema hotu ne'ebe hakna'ar-an iha instituisaun ida ne'e, no mós konfiansa iha instituisaun ne'ebe rasik.

Ita hotu iha espera katak ho esforsu ofisiais, sarjentus no ajente sira, ho apoiu husi parseiru hotu-hotu ne'ebe ohin señor Comandante Jerál hateten, ne'ebe hau aproveita mós atu agradese iha loran importante ida ne'e, modelu polisimentu VIP ne'ebe PNTL hakotu ona iha nina Planu Estratéjiku, sei sai realidade murak, hodi determina seguransa, estabilidade no bem-estar iha rai doben ida ne'e.

Votus susesu ba PNTL nu'udar instituisaun, no susesu mós ba ofisiais, sarjentus no ajente sira hotu.

Obrigadu ba ita bo'ot sira hotu nia atensaun.

Mini Museum PNTL prezerva istoria ba jerasaun foun

"Hametin memoria institusional no hatutan istoria ba gerasaun foun hodi hatene prosesu hari'i instituisaun PNTL, selae jerasaun foun sira la hatene Polisia ne'e hahu'u oinsa, forma oinsa, mai husi ne'ebe no uza lei saida hodi hari, nune'e wainhira jerasaun tuan laiha hotu karik mini museum ne'e bele hametin no hatutuan hafatin istoria PNTL nian"

Superintendente Arquimino Ramos
Komandante Centru Formasaun Polisia

Photo:Tomas M. Rodrigues/PNTL

A tu asegura no prezerva istoria Polisia Nasional Timor Leste (PNTL) ba jerasaun foun iha futuru, Komandu Jerál liu husi Centru Formasaun Polisia (CFP) Estabelese Mini Museum hodi bele rai didiak dokumentu no material hirak ne'ebe maka sai hanesan arkivu no istoria PNTL. Komandante CFP Superintendente Arquimino Ramos hateten Mini Museum ne'e hari ho objetivu atu bele rai no arquiva memoria no istoria dezenvolvimentu PNTL nian ba jerasaun foun atu hatene no hatutan istoria PNTL nudar instituisaun Seguransa ne'ebe assume responsabilidade seguransa interna Timor-Leste nian, nia hato'o asuntu ne'e iha serimonia lansamentu mini museum foin lalaiz iha CFP Comoro Dili.

Nia haktuir tan katak iha futuru Mini Museum ne'e bele fasilita gerasaun foun sira atu hatene istoria no lalaok oinsa maka PNTL hari'i, forma oinsa, mai husi ne'ebe no uza lei saida maka hari'i tanba ne'e maka mini Museum ne'e iha atu bele hametin historia sira ne'e atu labele lakon.

Superintendente Arquimino Ramos afirma tan katak museum ne'e estabelese ho orsamentu kontribuisaun husi ajente rekruta sira husi kuartu kursu formasaun ejente ne'ebe maka foin dadaun simu graduasaun hodi sai hanesan lembransa ida ne'ebe husik hela mai iha CFP.

Iha serimonia ne'e Segundu Komandante Jerál PNTL Komisariu Polisia Faustino da Costa ne'ebe ofisialmente inagura Mini Museum ne'e hateten estabelessimentu Museum ne'e atu bele define lolos istoria PNTL nian ba tempu naruk, katak ema balun ou karik estudante no membru PNTL rasik ne'ebe hakarak atu hakerek kona-ba asuntu balun liga ba seguransa, bele mai iha ne'e hodi hatene kona-ba prosesu desenvolvimentu PNTL no bele sai hanesan referensia ida.

Nia haktuir tan katak museum ne'e maka indika istoria ejistensia husi instituisaun PNTL iha prova no evidensia ne'ebe maka hakerek momos kona-ba lalaok no istoria lolos maka ema labele bosok, inventa ou muda nune'e sai istoria ba jerasaun foun no sai referensia ba futuru atu halo peskiza karik estudante ou PNTL sira hakarak hakerek konaba asuntu seguransa sira bele mai iha museum ne'e hodi halo

peskiza kona-ba prosesu dezenvolvimentu PNTL. Prosesu ne'e atu tau no hakerek istoria PNTL inkliu nia estrutura no lideransa sira desde Polisia ida ne'e hari tanba tinan 16 PNTL hari istoria barak maka lakon ona, buat balun ne'ebe ohin loron folin laek maibe tinan hirak oin mai buat hirak ne'e iha nia valor istoria ne'ebe folin bo'ot teb-tebes. Istorja, Dokumentus no sasan hirak ne'ebe maka rai iha mini museum ne'e seidauk kompleta no ita la imajina se ita tau buat hotu kompletu iha laran hanesan veikulu hirak ne'ebe maka uza inkliu infrastrutura modelu uma ida ne'ebe maka ohin loron ita uza lahanes an ho tinan 15 liu ba fotografia iha ka lae/ buat hirak ne'e ita la sente maibe lakon daudau ona no laiha ona iha ita nia sorin, hanesan mos iha parte infrastrutura no lejislasaun ne'ebe sempre iha mudansa tinan balun mai ema sei buka no sai refensia ne'ebe nia valor no folin bot teb-tebes.

Ita hotu iha ne'e ita akompana no asisti katak presiza buat barak atu halo hodi kompleta museum ne'e nune'e Komandante sira, Parseru GNR no TLPDP karik iha dokumentus rumo bele kontribui hodi kompleta museum ne'e.

Iha kestaun ida seluk atu dehan katak bele mós fatin ida ohin loron ita hotu hamrik iha ne'e tinan 20 ou 30 tuir mai sai museum bo'ot PNTL nian ida ne'e bele akontese se ita hotu kontribui atu kompleta saida maka ita tau iha istoria PNTL nian tanba tempu horseik la hanesan ho ohin no ohin lahanes an ho aban,

Antes termina Segundu Komandante Jerál ne'e apresia ideias ne'ebe mai husi Komandante CFP ho nia membru sira hotu hodi estabelese museum ida ne'e iha CFP, tanba ne'e ita hotu iha responsabilidade atu kompleta museum ida ne'e sai diak liu"tan no tau iha dalan ne'ebe los atu nune'e iha futuru mai bele iha valor boot ba PNTL no nasaun Timor-Leste.

Mini Museum ne'e inagura husi Segundu Komandante Jerál PNTL, akompanha husi Komandante CFP, Komandante Operasaun, Inspétor Jerál, Komandante Munisipiu, Parseru GNR no TLPDP konvidadus sira Media PNTL.

SEFI aprezenta Relotoriu Diagnostiku Nasional Ba PNTL

"Hadia prestasaun servisu no produtividate institusional ne'ebe maka sei menus hodi rejolve dezafiu ne'ebe maka iha hodi hadia no fortifika institusaun seguransa ne'e."

Deonisio Babo Soares

Ministru Kordenador asuntu Administrasaun do Estadu e da Justisa

Sekretariu Estadu Fortalesimentu Institusional (SEFI) aprezenta Relotoriu Diagnostiku Nasional kona-ba Planu Estratéjiku Dezenvolvimentu Nasional (PEDN) ba Polisia Nasional Timor-Leste (PNTL) nune'e bele hadia diak liu tan servisu administrasaun iha institusaun seguransa nian.

Diagnostiku ne'ebe maka hala'o hare liu ba aspetu institusional no rezultadu hatudu PNTL iha aspetu pojitu lubuk ida liu-liu iha konfiansa, programa, prosedimentu administrativu hanesan planu, ejekusaun orsamentu, no feramenta hirak ne'ebe maka iha PNTL nia laran.

Ministru Kordenador asuntu Administrasaun do Estadu e da Justisa Deonisio Babo Soares hateten hafoin SEFI halo diagnostika ba institusaun PNTL iha tinan kotuk komandante sira husu atu hare'e PNTL nia produtividate servisu no prestasaun servisu ne'ebe maka lao tia ona atu bele hadia diak liu tan, Nia hato'o kestaun ne'e iha enkontru aprezentasaun relotoriu Diagnostiku ba PNTL iha Kuartel Jeral Kaikoli Dili iha (03/06).

Nia reforsa tan katak liu husi diagnostika ne'e bele hare frakeja hirak ne'ebe PNTL infrenta no hare'e nia vantajen no desvantajen hafoin servisu hamutuk ho institusaun sira seluk tanba PNTL iha nia regras no prosedimentu jeral, planu estratéjiku no prosedimentu seluk ne'ebe maka trasa tia ona iha planu no presija implementa didiak nune'e PNTL iha produtividade diak liu tan

Iha dezafiu barak ne'ebe maka PNTL sei enfrente hanesan institusaun estadu sira seluk maibe PNTL nia rezultadu hatudu katak institusaun ne'e lao ba oin ona liu-liu tanba organizasaun ne'ebe hetan konfiansa husi ONU wainhira entrega servisu ne'e ba PNTL no ezekuta ho diak maske iha dezafiu relasiona ho kestaun administrativu, hadia prestasaun servisu no produtividade institusional ne'ebe maka sei menus hodi hadia no fortifika institusaun seguransa ne'e.

Entretantu iha fatin hanesan Segundu Komandante Jeral PNTL Komisariu Polisia Faustino da Costa hateten princípal tebes realiza diagnostiku ida ne'e hodi hare'e no reforsa institusaun ne'e tanba normalmente SEFI hare'e husi funsaun analitiku jeral ida atu identifika frakeza PNTL nian.

Iha sistema judisial ida ne'ebe PNTL mos hola parte iha laran bolu ita atu rezolve kazu ne'ebe komplikadu no prova loron ba loron husi sidadaun Timor-Leste no mos ema estranjeiru, ne'e los duni trata ba materia espesial no teknika maibe ita lao nafatin ba futuru no ita tenta atu ajusta diploma prosedimentu, estrutural no nesesidade ba nasaun, populasaun no ba institusaun.

Hau louva inisiativa ministeriu no parseiru UNDP ne'ebe involve iha laran hodi fo avaliasaun ne'ebe instala no hala'o husi SEFI liu-liu iha setor justisa nian, partikularmente ba PNTL.

Bainhira aktividade ne'e dezenvolve iha tinan 14 nia laran husi orgaun ne'ebe tama iha sistema justisa refere los duni to'o konkluzaun kona-ba nesesidade agora no mos ba futuru, bainhira atu aprezenta konkluzaun hirak ne'e hau hakarak hateten rezultadu ida ne'ebe sei la halo bainhira laiha kolaborasaun husi komandante unidade, xefe departamentu, komandante munisipiu sira no ekipa tekniku husi SEFI ba diagnostiku ne'ebe maka hala'o iha tinan 2015.

Hau apela ba Komandante sira, Xefe departamentu atu iha atensaun ba rezultadu ne'ebe sei aprezenta husi ekipa responsavel tanba sira analiza ho netral ida ne'ebe tebes duni no sei ajuda PNTL atu marka dalan ida ne'ebe diak ba futuru. Diagnostiku hala'o fulan balu ba kotuk no hau hakarak dehan deit enkontru ohin atu bele aprezenta fila-fali rezultadu diagnostiku ne'e ba komandante unidade no munisipiu sira, diagnostiku ne'ebe rasik detekta ona katak iha frakeja balu ne'ebe maka Polisia tenke hodi implementa diak liu tan planu estratéjiku PNTL 2014-2018.

Diagnostiku Nasional ba Fortalesimentu Institusional ho Lema/Moto mak "Vizaun ida, Planu ida no Asaun ida"

Serimonia aprezenta Relotoriu Diagnostiku Nasional ba PNTL ne'e diriji husi Ministru de Estadu Kordenador Asuntu Administrasaun do Estadu e da Justisa Deonisio Babo, akompanha husi Sekretariu Estadu Fortalesimentu Institusional Francisco da Costa "Borlaco" Segundu Komandante Jeral PNTL Komisariu Polisia Faustino da Costa no partisipa husi Komandante munisipiu, Komandante Unidade, Xefe departamentu PNTL, Diretor no ekipa tekniku SEFI, no parseru Dezenvolvimentu UNDP.

JULLU
AGOSTU

Aniversáriu PNTL ba dala XVI Fó Kondekorasaun Ordem Timor Leste ba eis Komisáriu PNTL Periode 2009-2015



Photo: Melquides do Nascimento/PNTL

Loron 27 fulan Marsu tinan 2016 sai hanesan Iorom. Importante ba Instituisaun Polisia Nasional Timor Leste (PNTL) ne'ebe selebra nia aniversáriu ba dala XVI. Ba tinan ida ne'e, serimonia aniversáriu PNTL nian hala'o iha Iorom 27 fulan Marsu iha Centru Formasaun Polisia, Comoro ne'ebe hala'o uluk ho misa Agradesimentu iha Iorom 27 fulan Marsu tinan 2016 ne'ebe preside husi amo kapelaun Nelinho Américo. Hafoin misa, Komandante Jerál PNTL Komisáriu Julio da Costa Hornay ne'ebe partisipa iha misa ne'e hamutuk ho membru hotu ba iha Monumento dos Martires da PNTL hodi fó homenajen ba membru Polisia ne'ebe mate iha krixe 2006.

Serimonia Aniversáriu PNTL ba dala XVI ne'ebe halo iha Akademia Polisia Comoro, iha Iorom 29 fulan Marsu tinan 2016 hahu'u ho apresentasaun Forças Parada ba Inspetor serimonia ne'ebe maka dirige husi Komandante da Parada Hermenegildo da Cruz. Hafoin ida ne'e, estandarte Nasional tama iha kampo Parada no hahu'u ho Um Minuto de Silêncio ne'ebe dirige husi Primeiru Ministru RDTL Rui Maria de Araújo.

Hafoin ida ne'e, hahu'u ho fó kondekorasaun Ordem de Timor Leste ba eis Komandante Jerál PNTL Longinhos Monteiro no ba eis Segundu Komandante PNTL Komisariu Afonso de Jesus. Kondekorasaun ne'ebe Presidente Repùblika fó liu husi Primeiru Ministru Rui Maria de Araújo ne'e hanesan Medalla Ordem husi governu hodi rekoñese ba dedikasaun servisu durante mandatu iha Instituisaun PNTL nian.

Ordem de Timor-Leste fahe ba grau ha'at maka hanesan: Grande-Colar; Colar; Medalha e Insígnia, ne'e destina atu rekoñese no agradese ba ema Nasionalis no Internasionalis ne'ebe tuir sira nia komportamento ka aktu pratikada, sai hanesan kontributu ne'ebe signifikativu no iha benefisiu ba nasau, ema Timor oan no umanidade. Iha serimonia ne'e, le'e mós Leitura dos Decretos Presidenciais ba Ordem de Timor Leste hanesan, dekreta iha n.º 14/2016 de 9 de Março hodi fó Kondekorasaun ba Dr. Longinhos Monteiro nu'udar eis Komandante Jerál Polisia Nasional Timor Leste (PNTL) no dekretu lei n.º 14/2016 de 9 de Fevereiro hodi fó Kondekorasaun ba Sr. Komisariu Afonso de Jesus ne'ebe assume kargu hanesan eis Komandante Jerál Interinu.

PNTL. No Promosaun husi Ajente ba Ajente Prinsipál tui Despaxu husi Comandante Geral, Nº 124/CG-PNTL/III/2016 no Despaxu Nº 126/CG-PNTL/III/2016 Promosaun husi Sargento ba Primeiro Sargento.

Kondekorasaun : Medalha de Mérito de Segurança ba Eis Administrador Munisipiu Ainaro, Japão Internasional Cooperation Agency, The Asia Foundation no Chefe-Suco de Fatulia, Posto Administrativu Venilale, Munisipiu Baucau. Kondekorasaun: Medalha de Comportamento Exemplar Grau Prata ba Inspector Chefe Leonela do Rosario Martins, Inspector Lino de Jesus Vinhas, Primeiro Sargento Francisco Martins, Sargento Inês Maria. Kondekorasaun: Medalha Comemorativa de Comissão Serviço Especial : Guiné-Bissau 2014/2015 ba Sargentu Xefé Terezinha de Sousa.

Além fó kondekorasaun no Promosaun ba membru PNTL iha aniversariu ne'e, hala'o mós promosaun tui Antiguidade ba membru PNTL iha munisipiu, wainhira Komandante Jerál no Segundu Komandante Jerál hala'o visita ba iha munisipiu.

Promosaun tui Antiguidade ba membru husi Agente ba Agente Prinsipal, Agente Prinsipal ba Agente Xefe , Sargento ba primeiro Sargento.

Iha serimonia Aniversáriu PNTL nian, aktual Ministru Interior Longuinhos Monteiro simu Kondekorasaun Ordem de Timor Leste, husi Prezidente da Repùblika hato'o ninia sentimento orgullu tanba iha tinan neen nia laran ho situasaun difisil ne'ebe estadu enfrenta iha momentu ne'ebe ho regra, akordu supplementar Nasoens Unidas ninia ne'ebe bele implika misaun Nasoens Unidas ninian iha momentu ne'ebe.

"Kna'ar ida ne'ebe fó mai hau para depois bele hadia Polisia, gestaun iha ninia komandu, iha ninia kapasidade e hodi nune'e ho esperiênsia barak ita hala'o durante tinan 16 nian laran, ita konsege 2012 foti desizaun politika estadu nian hodi termina misaun Polisial Nasoens Unidas ninian".

Eis Komandante Jerál ne'e mós realsa katak ho medalla ne'ebe nia simu hanesan rekoñesimentu ne'ebe Presidente Repùblika fó ba nia tanba dedikasaun servisu ne'ebe nia hala'o durante ninia mandatu tinan neen.

"Ohin rekoñesimentu ne'e mai hau sente orgullu, laos ba hau nia ann rasik. Hau hanesan lideransa, somente orienta liu husi hau nia lideransa, ne'ebe medallha ne'e hau hanesan pessoal, entrega mós ba Polisia Nasional Timor Leste, ba mane fetu, ba sira ne'ebe didika sira nia ann kleur ona iha Instituisaun nia laran e medallha ida ne'e, hau mak simu iha sira nia naran. E sira maka merese liu atu hetan medallha ida ne'e tanba misaun ne'e susesu laos sukat husi hau nia lideransa, maibe liu husi hatudu sira nia komportamento, hahalok, disciplina, no sira nia dedikasaun", hateten Ministru Interior hafoin serimonia aniversariu.

Partisipa iha serimonia aniversáriu PNTL nian ne'e membru do governu, membru Parlamentu Nasional, veteranus, no konvidadu espesial husi Satgas Pamtas husi Indonesia, no ikus husi serimonia ne'e hetan animasaun husi Banda Drand-Ben Eskola Paulo VI.

Estatístiku Nasional Insidente no Tránzitu 2016

Estatístiku Insidente Nasional 2016

Munisipiu	Jullu	Agostu
Aileu	4	3
Ainaro	4	10
Baucau	16	22
Bobonaro	3	18
Cova Lima	12	11
Dili	168	154
Ermera	65	34
Lautem	11	7
Liquica	24	29
Manatuto	9	11
Manufahi	1	6
Oecusse	32	35
Viqueque	5	11
TOTÁL	354	351

Estatístiku Tránzitu Nasional 2016

Munisipiu	ASIDENTE HOTU-HOTU		VITIMA NE'EBÉ KANEK		ASIDENTE FATAL	
	Jullu	Agostu	Jullu	Agostu	Jullu	Agostu
Aileu	5	3	4	4	0	0
Ainaro	3	4	4	2	0	0
Baucau	11	9	17	10	0	1
Bobonaro	5	7	7	8	0	1
Cova Lima	1	1	2	1	0	0
Dili	103	77	79	91	0	2
Ermera	7	9	9	18	0	0
Lautem	3	3	3	4	0	0
Liquica	10	13	13	22	2	1
Manatuto	4	6	5	6	0	1
Manufahi	5	1	16	2	0	0
Oecusse	8	6	9	6	0	0
Viqueque	5	3	4	9	0	0
TOTÁL	170	142	172	183	2	6



PM Rui Maria de Araújo hala'o pasa revista ba parada iha Loron Aniversariu PNTL ba 16



Membru UEP tuir treinamento huru-hara



Komandante Jerál PNTL Kondekora membru ne'ebe servisu ho lealidade

Photo: Melquides do Nascimento/PNTL



Komandante Jerál PNTL foto hamutuk ho membru UPF

Photo:Tomas M. Rodrigues/PNTL



PM Rui Maria de Araújo simbolikamente entrega xave motorizada ba membru OPS



Komandante Jerál PNTL Kondekora membru ne'ebe servisu ho lealidade

Photo: Melquides do Nascimento/PNTL



Presidente ZEEMS partisipa iha loron aniversariu UPF ba 13

Photo:Tomas M. Rodrigues/PNTL

P iha'asaun

UEP

estabelese Pelutaun Seksaun Kontra Terorista

Unidade Espesial da Polísia (UEP) estabelese Pelutaun Seksaun Anti Terorista (SAT) hodi antisipa terorista no aktividade terorismu ne'ebe fo amisa ba seguransa no estabilidade nasau iha futuru.

Komandante Jeral PNTL Komisari Polísia Julio da Costa Hornay iha nia intervensaun hateten membrus Pelutaun SAT ne'ebe maka kompostu husi ema nain 24 ne'e prepara atu antisipa amiasas balun ne'ebe karik aban bainrua akontese iha ita nia nasau, tanba ne'e forsa seguransa preparadu atu halo atuausau, Nia hato'o kestaun ne'e iha serimonia enseramentu estajiu ba kursu kontra terorismo no estaziu baze ba ajente UEP, iha Quartel UEP Bairo-Pite Dili, Kinta (14/04).

Nia haktiurta katak Pelutaun SAT nia servisu foka liu ba atendementu terorista wainhira akontese terorismu iha Timor-Leste; Ho ekipamento baziku ne'ebe maka agora iha Komandu sei tenta hare hela oinsa atu fasilita sira nia ekipamento no orsamentu oinsa sira bele preparadu atu atende karik akontese terorismo ruma iha ita nia rain.

Kestiona konaba total membru batelaun SAT nain 24 deit eis Komandante Centru Formasaun Polísia ne'e hateten provizoriu ita ho numeru ida ne'e bazeia ba nesesidade, depois ita hare oinsa atu dezenvolve ba oin.

Iha fatin hanesan Komandante UEP Superintendente Xefe Afonso dos Satos hateten membrus Pelutaun SAT forma husi instruktor nasional ne'ebe maka iha esperensia no simu ona formasaun iha Portugal, no Pelutaun SAT integra iha Kompania Operasaun Espesial nia okos.

Kompania Operasaun Espesial iha pelutaun tolu maka hanesan Batelaun Ordem Publiqua (BOP), Compania Operasaun Espesial (COE), Corpu Seguransa Pessoal (CSP) no Pelutaun de Apoio Servisu ne'ebe maka iha tempu badak sei muda naran ba Kompania Apoio Servisu (KAS), Seksaun Sinoteknika ne'ebe sei ejisti ih tempu badak, Seksaun IOD ne'ebe maka dezenvolve tia ona durante tinan hat ho formasaun husi nasau barak tau hamutuk sai orijen UEP Timor-Leste nian.

UEP nia vokasaun atu mantein no reestabelese ordem publiqua, rejolve insidente kritiku, halo intervensaun tatica bainhira iha situasaun ne'ebe kompleksu no risku boot, halo inatibasaun ba bomba, responsavel ba seguransa pessoal no instalasaun sira ne'ebe sensivel no iha misau sira seluk ne'ebe importante.

Atu dezenvolve koñesementu no hasae kapasidade membru SAT nian maka iha loran 18 fulan Outubru membru SAT na'in 21 akompaña husi Instructor na'in rua (2) ne'ebe maka formadu husi Guarda Nacional República (GNR) Portugal desloka ba Portugal hodi tuir formasaun Kontra Terorista durante fulan rua (2) 18/10 to'o 19/12 tinan 2016 hafoin formasaun iha Portugal sei kontinua halo treinamento durante fulan rua (2) iha Rairobo (Munisipiu Bobonaro).

Antes desloka ba Portugal membru SAT halo ona preprasaun fiziku durante fulan neen (6) no kursu lingua Portuguesa durante fulan rua (2) nia laran alende ne'e iha loran Sexta 14 Outubru halo teste fiziku hodi hare'e kapasidade membru sira nian wainhira halai.

Orsamentu ba formasaun ne'e hamutuk \$400.000 ne'ebe maka koloka ba iha UEP hodi uza ba iha treinamento no sosa ekipamento ba Seksaun Anti Terorista (SAT).

Pelutaun Seksaun Anti Terorista (SAT) integra iha Kompania Operasaun Espesial nia okos ho nia misau prinsipal atu antisipa terorista no aktividade terorismu ne'ebe fo amisa ba seguransa no estabilidade nasau.

Pelutaun SAT estabelese iha loran 14 Abril tinan 2016 ho total membru hamutuk 24, No serimonia enseramentu estajiu ba kursu kontra terorismu prezidi husi Komandante Jeral PNTL no partisipa husi Ministru Interior Longinhos Monteiro, Eis Ministru Interior Rogerio Tiago Lobato, Eis Komandante Jeral PNTL Paulo Martins, eis Segundu Komandante Jeral PNTL Komisari Afonso de Jesus, Embaixador Portugal ba Timor-Leste, Korpus Diplomatikus, Konvidadus no familia boot UEP.



Photo:Estevao Pereira/PNTL



Photo: Melquiades do Nascimento/PNTL

Komando PNTL entrega motorizada ba membru OPS

Atu apoio servisu Ofisial Polísia Suku (OPS) nian iha terrenu, Komando Jerál Polísia Nasional Timor Leste (PNTL) entrega motorizada ba membru OPS hamutuk atus-rua-lima-nulu-resin-sia (259).

Komisari Polísia Julio da Costa Hornay ne'ebe entrega diretamente xave no motor inklui dokumentus motorizada hateten, viatura hirak ne'ebe sosa ho orsamentu governu nian husu atu Ofisials sira ne'ebe simu motorizada atu bele utiliza tuir nesesidade servisu ninia iha terrenu.

"Hau atu hato'o ba imi katak viatura ka transporte motorizada sira ne'ebe maka governu fó mai ita, utiliza tuir nesesidade servisu ne'ebe maka ita bo'ot sira iha no ho komprimisiu ne'ebe ita bo'ot sira halo, husu atu bele utiliza motorizada hirak ne'ebe ba servisu tuir idak-idak nia nesesidade," hateten Komandante Jerál Julio da Costa Hornay iha ninia diskursu ba membru OPS sira.

Komisari Polísia Julio da Costa Hornay apela ba membrus OPS sira katak politika ida ne'ebe maka governu konkorda ho ideas Komandu Jerál, ne'e duni husu atu bele asegura ho didiak, implementa didiak no labele viola fali.

Planu sosa motorizada ba OPS ne'e, bazea ba razaua ne'ebe Komandu iha wainhira hala'o vizita ba munisipiu 13 hafoin simu mandatu, problema sira ne'ebe maka autoridade lokal sira apresenta maka falta ba apoio ba transporte.

"Ho razaua hirak ne'e maka Komando debate no desidi atu koloka orsamentu ba nesesidade ida ne'e, ita implementa, tanba Polísia Komunitariu sai prioridade ida iha area tolu ne'ebe maka governu ezije ba Instituisaun PNTL, primeiru Polísia Komunitariu, segundo fronteiras, terceiru Marítima inlkui mós tranzitu rodoviáriu", afirma Komandante Jerál PNTL.

Planu sosa motorizada hirak ne'e tanba hetan konkordansia entre governu ho Komando nian kona-ba nesesidade servisu OPS nian iha baze. Total viaturas ne'ebe maka fahe iha serimonia ne'e hamutuk: 259 motorizada, karreta 4, karreta ambulansia 1, karreta emergensia 1 no karreta hilux 2 no tuir planu husi Komando Jerál nia katak iha futuru sei fahe tan radio komunikasaun no laptop hodi bele completa servisu iha terrenu.



Photo:Estevao Pereira/PNTL

DEZENVOLVIMENTU SISTEMA JESTAUN INSIDENTE

Prosesu Implementa Sistema Jestaun Insidente/IMS

Incident Management System (IMS) ou Sistema Jestaun Insidente, hahu'u implementa iha Munisipiu Dili iha , 24 Abril 2012 liu husi fundus husi Programa Nasoens Unidas ba Dezenvolvimentu (PNUD) hodi dezeña aparello ho naran Incident Management System (IMS) ba PNTL no Case Mangement System (CSM) ba Ministériu Públiku no Tribunal. Realizasaun ba instalasaun aparello ne'e hala'o husi kompaña Xfact husi Estadus Unidos Amerika. Wainhira Sistema ne'e aplika iha terenu, hetan mós apoio finanseiru husi TLPDP hanesan komputador, máquina printer, máquina fotokopia inklui mobilarios balun.

Ho modelu servisu IMS nian hodi rejistru kazu krime, servisu patrullamentu no tránzitu tuir Sistema ne'ebe aplika, IMS nia proseduramentu servisu husi informasaun ne'ebe maka iha sei sai baze dadus hodi halo analiza ba problema sira ne'ebe akontese iha kada munisipiu.

Iha Kuartel Jerál da PNTL, Sistema Jestaun Insidente/IMS hari'i iha 25 Fevereiro 2013, liu husi Gabinete Komandante Jerál. Membrus na'in ne'en (6) kompostu husi Seksau IT, Centru Formasaun Polisia (CFP) no Investigasaun mak oras ne'e halo servisu iha Seksau IMS. Nune'e mós aparello refere instala tiha ona iha Munisipiu 12 inklui mós ba SIKN, UPF, UEP no UPM.

Iha ninia hirarkia servisu, seksau ne'e tama iha Komando Operasaun Nasional nia areas responsabilidade.

Objetivu ba Kriasau Seksaun Sistema Jestaun Insidente

1. Atu PNTL bele iha sistema elektronika ne'ebé diak no bele fó informasaun sira kona-ba krime, patrulla, no tránzitu nian hotu ne'ebe rejistru ona iha PNTL.
2. Sai baze de dadus ba PNTL liu-liu iha area Administrasaun, Operasaun, Investigasaun, no Intelijen atu bele uza dadus hirak ne'e, wainhira atu halo planu aktividade asaun annual kada tinan.
3. Atu PNTL bele iha informasaun ne'ebe diak, akuradu kona-ba mandadu detensaun ba ministériu públiku, tribunal no mandadu de prizaun ne'ebe ministériu públiku/tribunal entrega ba PNTL hodi ezekuta, no mandadu sira ne'e tenke rejistru hotu iha sistema mandadu nian.
4. Atu prepara relatoriu semanal, mensal no annual, kona-ba estatística kona-ba Insidente, tipu Krime, tipu Aktividade Patrullamentu Polisia nian, no servisu tránzitu seguransa rodaviaaria nian ba Komandante Jerál da PNTL, tuir dadus ril ne'ebe rejistru iha Sistema Jestaun Insidente.

Organigrama Seksau Sistema Jestaun Insidente/IMS

Xefe SSJI Inspetur Asistente Mariano Soares



Xefe Seksau Sistema Jestaun Insidente, responsabilidade ba servisu Seksau SSJI hodi kontrola servisu seksau SSJI no halo relatoriu ba Komandante Jerál da PNTL kona-ba krime ne'ebe akontese iha teritoru Timor-Leste. No mós asegura informasaun sira iha baze de dadus.

Analista Krime: Agente Xefé Gilberto Paulo



Analista krime nia servisu mak halo relatoriu estatística krime nian, halo avaliaasaun no kontrola kazu ne'ebe rejistru iha sistema, hare'e kualidade informasaun ne'ebe produz iha sistema, halo treinamento no fó informasaun kona-ba oinsa maka preense formulariu ne'ebe diak, ba membru investigasaun sira hotu kona-ba lalaok sistema jestaun



incidente no investigasaun. Analista Patrulla. Sargento

ihā modul patrulla, fó treinamento ba membru sira ne'ebe servisu iha eskuadra/ unidades sira kona-ba oinsa atu produz relatoriu aktividade diáriu.



Analista Tránzitu. (Foto: Sargento Antonio Zakarias Seran)

Analista Tránzitu nia servisu hodi kontrola no fó treinamento kona-ba oinsá produz relatóriu ne'ebe adekuadu no kualidade diak iha sistema, no mós oinsá priense formatu nota infrasaun no formatu asidente nian iha sistema. Iha ne'e foka liu ba oinsá kria no produz informasaun. Iha sistema jestaun insidente/IMS, butaun tránzitu ne'e, uza deit ba servisu seksau tránzitu sira hodi registru aktividade tomak ne'ebe iha relasaun ho servisu tránzitu nian.

Inagurasau kazerna PNTL iha munisipiu Ermera no Oecusse



Photo:Tomas M. Rodrigues/PNTL

Komando PNTL, iha ninia diskursu ba Serimonia Inagurasau Bairo PNTL hateten governu nia política hato'o mai iha Komandu maka kria kondisaun ba Polisia Nasional Timor Leste (PNTL) nia membru sira.

Vizibilidade, Involvimento no Profesionalizmu Polisia Nasional ninian sei integra mós bainhira pesoal idak-idak nia servisu se la preukupa ho kondisaun balun, tantu iha nia familia no nia uma tanba hanoin ba iha distansia, maka hamos profesionalizmu atendimento público ba kestaun seguransa buat ida ne'ebe maka sai hanesan konsiderasaun ba pesoal idak-idak atu ezekuta, implementa no hala'o.

Diretor Kompaña Konsorsiu Grup Sala LDA Domingos José da Costa, ne'ebe maka hetan responsabilidade ba iha kontrusaun Uma ba PNTL iha Munisipiu Ermera hateten, maske hetan difikuldade iha prosesu kontrusaun nian, maibé parte Kompaña konsege finaliza projetu ne'e hodi entrega ba iha PNTL.

Total orsamentu ne'ebe maka preve husi governu ba Kompaña ho montante \$1.220.000, maibé husi orsamentu refere la suficiente atu bele finaliza projetu ne'e, nune'e Kompaña hasai osan rasik ho total \$1.504.000 hodi finaliza projetu Uma ba PNTL iha Munisipiu Ermera.

Entertantu, serimonia inagurasau bairo PNTL iha rejaun espesial Oecusse ofisialmente inagura husi Komandante Jerál PNTL Julio da Costa Hornay no Prezidente Autoridade Espesial Oecusse Dr.Mari Alkatiri.

Prezidente ZEEMS Dr. Mari Alkatiri ne'ebe partisipa iha serimonia ne'e hateten kaserna hirak ne'e halo kleur ona, maibé tamba hetan seguransa husi parte Polisia nune'e, kaserna hirak ne'e bele dura to'o tempo hetan inagurasau.

"Lei hari'i Rejaun Administrativa Espesial Oecusse Ambeno define kedas katak Komando Polisia no Komando Forças Armadas ida deit, Komando Jerál iha Dili no Komando iha rejaun no iha munisipiu, responde entermos operacionais ba Komando Jerál", tenik Prezidente ZEEM hafoin inagura kaserna PNTL iha rejaun Oecusse.

Dr. Mari Alkatiri hateten tan katak, Lei mós define dever de kooperasaun koordenaasaun entre autoridade rejaun ho naturalmente no Komando Jerál tu'un mai iha Komando iha rejaun, tamba ne'e normal wainhira Polisia presija apoio ruma husi autoridade no autoridade iha kondisaun atu fó apoio.

"Akontese iha tinan kotuk, oportunidade ida ne'ebe diak para bele hahu'u hadia oituan kompleksu (bairro) ida ne'e no ho kondisaun minímu no básica para bele Polisia sira hetan fatin atu hela, atu deskansa para bainhira presija sira atu halo operasaun, sira pronto atu halo operasaun", hateten Prezidente ZEEMS.



Aniversariu UPF ba dala 13 Hametin **disiplina seguransa fronteira**

Atu asegura seguransa fronteira terrestre membru Unidade Polisia Fronteira (UPF) tenke hametin disciplina hodi asegura seguransa fronteira husi atividade kontra bandu.

Komandante Jeral PNTL Komisari Polisia Julio da Costa Hornay hateten UPF hari tinan 13 ona hodi hala'o misaun sagradu ne'ebe importante ba nasau ida ne'e maka seguransa fronteira terrestre entre Timor-Leste ho nasau vizinu Republika Indonezia husi ema no sasan atu labele tama ilegalmente mai Timor-Leste.

Haktuir tan katak UPF tenke forte no aten brani hodi asegura fronteira, membru UPF hotu ne'ebe kolokadu iha fronteira atu servisu ho responsabilidade, dignidade, justu, onestu no professional tanba seguransa fronteira iha imi nia liman.

Nudar jerasaun foun tenke servisu maka'as, sakrifika aan hodi defende no tane ass ukun rasik aan ne'e atu labele monu ba rai, servisu maka'as hodi dezenvolve nasau. Atu alkansa mehi ida wainhira lutu ba nasau metin, importante liu maka fronteira terrestre no maritima entre Timor-Leste ho Indonezia no Australia.

"Hodi Komandante Jeral nia naran Hau hakarak hato'o parabens ba Komandante UPF ho nia membrus tomak ne'ebe ohin loron halo tinan ba dala 13 No Hau husu ba imi atu labele monu ba tentasaun diak liu kiak maibe iha dignidade tanba ne'e tenke tau ass no ho responsabilidade maximu ba servisu ida ne'e".

Iha okajaun ne'e Komandante UPF Superintendent Polisia João Belo iha nia deskursu hateten, Progresu lubuk ida liu tia ona no susesu lubuk ida mos ita hetan tia ona prestasaun servisu husi membru UPF mos hatudu dadauk ho misaun ne'ebe maka Estadu Timor-Leste tula ba UPF nia kbaas hatudu ho suksesu tanba ita forsa ki'ik maibe ho parseria ho TNI ita lao ho susesu maske iha limitasaun oin-oin maibe parseria metin.

Nia haktuir tan katak UPF hamrik metin hodi asegura seguransa iha lina fronteira Liu husi misaun servisu parseria ho belun TNI Sat Gas PAMTAS RI-RDTL no ministeriu interligadu sira iha zona fronteira, atu hamosi situsauna ne'ebe maka kontroladu iha jona fronteira hahu iha Mota Masin Suai mai to'o Citrana Oe-Cusse, liu husi patrulamentu iha tempu kalan no loron, iha tempu udan no loro manas no toba iha ai laran fuik hodi hatutan sakrifisiu ne'ebe maka funu nain veteranus sira hala'o tia ona sai exemplu pozitivu atu banati tui iha tempu independensia.

"Hau ejiji ba membrus PNTL/UPF hot-hotu atu sente sai nain ba servisu ne'ebe maka estadu fo ba ita, orgulu no onra bo'ot tanba hetan fieri husi estadu atu hamrik iha lina fronteira ho bandeira RDTL ne'e hanesan responsabilidade boot tanba ne'e tenke aumenta profesionalismu, hametin disciplina, no orgulu ba servisu ne'ebe ita halao, implementa

ho rigorouj lei sira ne'ebe maka fo mandatu ba ita maske ita lao neineik maibe ita lao beibeik," Komandante Belo.

Antes hakotu nia deskursu Komandante UPF ne'e husu ba Nai Ulun no Autoridade governu, lideransa Komunitaria, NGO no Parser Ministeriu Interligadu ba servisu fronteira atu ajuda no servisu hamutuk ho membrus UPF tomak hodi asegura seguransa iha lina fronteira nune'e bele detekta no deskobre aktu Kriminal liu husi partisipasaun no kontribuisaun husi komunidade hodi garante situauna seguransa ida ne'ebe harmonia, paz no respeitu malu entre komunidade nasau rua nune'e fronteira sai zona ida ne'ebe seguru ba atividade governu, ema estranjeiru nomos Komunidade.

Iha serimonia ne'e Prezidente Zona Ekonomia Espesial Merkadu Sosial (ZEEMS) Oe-Cusse Marie Alcatiri hateten Patrulamentu Fronteira halo parte iha conseitu seguransa Interna tanba ne'e governu desidi fo Patrulamentu Fronteira ba PNTL ho apoiu husi F-FDTL, UPF hanesan Unidade Espesial ida Polisia nian atu garante patrulamentu ita nia fronteira.

Patrulamentu ne'e ita hatene iha fronteira ida ne'ebe ita nia vizinu uza liu forsa armada duke Polisia, Indonezia to'o agora sei mantein nia politika fronteira forsa armadas maka garante seguransa.

Governu Timor-Leste hatutan mensajen ida ba Indonezia katak funu hotu ona mai ita hamutuk atu garante seguransa, seguransa fronteira ita nian liu-liu atu labele husik kontra bandu atu tama, kontra bandu no tráfiku de armas, tráfiku humano no tráfiku droga;

"Hau bele hateten katak koperasaun servisu UPF iha Fronteira todan tebes tanba meius no kondisaun seidauk to'o maibe servisu daudaun bainhira elementu ida ka rua halo sala la signifika katak unidade tomak halo sala maibe Unidade tomak halo servisu no sira nia sakrifisiu no kumpri sira nia misaun atu halo seguransa ba fronteira para labele husik infiltrasaun oin-oin atu tama Timor-Leste," dehan eis primeru Ministru ne'e.

UPF hamrik iha loron 30 fulan Setemburu tinan 2003 iha Marsu, kapital postu administrativu Cailaku munisipiu Bobonaru ne'ebe maka inisia husi Peace Keeping Force (PKF) Australia sira no Lidera husi ofisial PNTL atual Inspetor Jeral Superintendent Xefe Carlos Jeronimo, iha situsaun ne'ebe maka difisl tebes maibe ita hakarak diak ba estadu Timor-Leste.

Serimonia Aniversariu UPF ba dala 13 ne'e partisipa husi Prezidente ZEEMS Mari Alcatiri, Membru Parlamentu Nasional, Prokurador Rejiaun Oe-Cusse, Embaxadora nova Zelandia Vicky Pool, Xefe The Asia Fundation (TAF) Susan Marx, konvidadus no komunidade sira.

Membru **PNTL Asegura Seguransa ba Eleisaun Suku**

Membru PNTL Nain 2.893 fó seguransa ba Eleisaun Suku ne'ebe maka hala'o iha loron 29 Outubru tinan 2016 iha teritoriu Timor laran tomak, deslokasaun membrus ba munisipiu 12 ofisialmente hala'o liu husi Formatura jeral Deslokasaun Forsta Apoiu Eleisaun Suku iha Kuartel Jeral PNTL.

Komandante Jeral PNTL Komisari Polisia Julio da Costa Hornay hateten PNTL preparadu no prontu atu fó seguransa ba Eleisaun Suku ne'ebe maka hala'o iha aldeia 2.225 tanba Seguransa ba Eleisaun Suku hanesan faze ida atu esprimenta kapasidade forsa PNTL atu asegura festa demokrasia ida ne'e, Nia hato'o asuntu iha serimonia Formatura Deslokasaun Forsta Apoiu Eleisaun Suku iha Kuartel Jeral PNTL Kaikoli Dili.

Nia haktuir tan katak iha tinan hirak liu ba ita halo seguransa ba eleisaun dala tolu Eleisaun Suku dala ida no Eleisaun Jeral hamutuk ho forsa Nasoens Unidas maibe ba tinan ida ne'e primera vez ita halo mesak no asegura ho ita nia forsa rasik ida ne'e sai hanesan esperensi bo'ot ida ba ita atu sai forti liu tan liu-liu hodi prepaaran ba Eleisaun Jeral iha tinan 2017.

"Husu ba membru tomak ne'ebe hala'o kna'ar importante ida ne'e atu hala'o imi nia never ho diak no professional hodi asegura prosesu eleisaun iha aldeia sira ne'ebe atu koloka imi ba, hatudu no asegura disciplina, etika moral bainhira hala'o knar iha komunidade nia leet," Komandante Jeral ne'e apela. Lao ba Hala'o kna'ar, fieri anatak ita prontu atu hala'o ita nia never, kopera ba malu no apoiu malu, fó laran ba malu atu nune'e sevisu bele lao diak, tanba laiha ema ida mesak susesu maibe hamutuk ita bele halo buat diak ba ita nia povu no nasau.

Kestiona kona ba preparasaun lojistikais eis Komandante Centru Formasaun Polisia ne'e hateten Komandante prepara ona transporte atu fo apoiu deslokasaun husi Dili ba munisipiu 12, Aliende ne'e mos fo apoiu ba sira Ransum Kombate (aihan) para sira bele han iha tempu sira la biban atu tein ou han buat ruma entau sira utilija ida ne'e atu prepara anafatin hodi fo apoiu seguransa.

Laiha orsamentu ba operasaun ne'ebe normalmente \$10 kada loron tanba ne'e membru sira utilija ona orsamentu alimentasaun, tanba ne'e komandante desidi hodi adianta orsamentu ba fulan Outubru nian ba membrus sira hotu ne'ebe distribui ona nune'e sira bele simu no utilija durante halao seguransa ba Eleisaun.

Deslokasaun membrus barak liu ba munisipiu 4 tanba aldeia

barak exemplu Baucau tanba ne'e presiza reforça tan sira atu bele to'o ba Sentru Votasau hotu, alende ne'e iha ekipa rezerva ne'ebe maka preparadu no UEP sei stand bay iha Komandante atu halo movimento ba mai no fo apoiu bainhira iha perturbasaun ka problema ruma iha Sentru Votasau ne'ebe presiza apoiu.

PNTL preparadu no prontu atu asegura seguransa no husu ba entidade hotu-hotu liu-liu ba autoridade lokal, Xefe Suku, Xefe Aldeia no komunidade sira atu fo apoiu tomak hodi asegura eleisaun tanba eleisaun ne'e importante ba ita nia sugu.

Entretantu hafoin Eleisaun Suku iha loron 7 fulan Novemburu Komandante Komandante Operasaun Superintendente Xefe Henrique da Costa komfirma katak durante fo seguransa ba Eleisaun Suku iha loron 29 fulan Outubru mosu problema ou insidente hamutuk 12 hanesan joven balu hemu tua lanu no tenta tama iha sentru votasaun ho intensaun atu impede Eleisaun Suku no tenta atu foti Bulletin De Votos husi brigada sira, hahalok hirak ne'e konsidera hanesan krimi.

Nia haktuir tan katak PNTL konsege kaptura suspeitu hirak ne'e lori prosesu ba Tribunal no entrega ba Komandante PNTL munisipiu ida-idak hodi kontinua halo prosesu investigasaun; Insidente ne'ebe akontese iha munisipiu Dili, Ainaro, Baucau, Viqueque, Lautem no Cova-Lima miabe membru PNTL ne'ebe maka koloka iha sentru votasaun hirak ne'e konsege atua no responde ba situauna hirak ne'e.

Maske mosu problema balu iha Sentru Votasau maibe PNTL kontinua mantein seguransa no Eleisaun Suku lao ho diak no tuir rezultadu husi STAE katak Kandidatu Sefe Suku barak maka pasa ba Segunda Volta tanba ne'e iha loron 13 fulan Novemburu sei hala'o eleisaun segunda volta maka oras ne'e dadaun komandante PNTL prepara hela planu operasaun no membru hodi fo apoiu seguransa.

Relasiona ho Eleisaun Suku segunda volta ne'ebe maka sei halao iha loron 13/11 Komandante Komandante Operasaun ne'e husu ba Komunidade sira nia apoiu no koperasaun hamutuk ho membru PNTL ne'ebe maka koloka iha sentru votasaun hodi asegura seguransa atu nune'e eleisaun segunda volta bele lao ho susesu.

Serimonia Formatura Deslokasaun membru forsa seguransa ba apoiu Eleisaun suku ne'e partisipa husi Komandante munisipiu, Unidade, Departamento, Servisu, Centru Formasaun, Offisial Subalternus, Sarjentu no Ajente tomak.





Povu Timor-Leste %64 Tau Konfiansa Ba PNTL garante prevensaun konflitu

Photo:Tomas M. Rodrigues/PNTL

Relatoriu levantamento persepsaun Polisia no Komunidade iha tinan 2015 ne'ebe maka lansa husi Fundasaun Asia hatudu katak Povu Timor-Leste porsentu(%) 64 tau konfiansa ba Polisia Nasional Timor-Leste (PNTL) nia prezensa iha komunidade nia le'et liu husi sevisu Polisia Komunitaria.

Persentajen ida ne'e ba nasau Timor-Leste ne'ebe dezenvolve nia aan lori orgullu ba PNTL ho interasaun Polisia iha komunidade nia le'et liu husi sevisu Polisia Komunitaria ne'ebe maka koloka Ofisial Polisia Suku(OPS) iha suku 442 iha teritoriu laran tomak hodi moris no servisu iha komunidade nia le'et.

Representante Fundasaun Asia Susan Marx iha nia deskursu hateten relatoriu levantamento ida ne'e hatudu informasaun diak balun ba Polisia tanba respondente barak liu tan maka sente optimista kona-ba situaun seguransa kompara ho tinan 2013 tanba iha ona aumentu iha uza PNTL hanesan pontu kontakta dahuuk bainhira akontese krome, Nia hato'o kestaun ne'e iha lansamentu relatoriu Levantamento Kona-Ba Persepsaun Polisia No Komunidade iha Hotel Timor foin lalaus ne'e.

Nia informa tan katak levantamento ida ne'e ho objektivu atu apoia PNTL atu halo monitorizaun no avaliaun ba Planu Estratejiku 2014-2018. Tanba ne'e maka levantamento ida ne'e muda ona konsentrasaun husi identifika abertura ba apoio dezenvolvimentu Polisia ba fornese prova direita hodi apoia implementasaun no foti desijaun.

Entertantu Ministru Interior Longuinhos Monteiro hateten Prezensa Polisia iha komunidade nia le'et bele garante prevensaun konflitu tanba liu husi prezensa Polisia nian bele hakbesik aan ba komunidade, halo interasaun no hametin liu tan konfiansa komunidade ba Polisia nudar autor seguransa.

Nia reforsa tan katak involve iha prevensaun konflitu no garante asistensia ba komunidade hanesan atividade primaria iha Polisia komunitaria ne'ebe maka importante iha kna'ar Polisiamentu tuir filosofia PNTL ne'ebe hateten atividade proximidade loron-lorom nian hamutuk ho komunidade mak sai hanesan indikador importante hodi sukat interasaun Polisia no komunidade.

Polisia nia aktividade no prezensa iha rejolusaun konflitu ba kazu ne'ebe maka komunidade infrenta aas ho persentajen ida adekuadu reprezenta Polisia nia misaun ne'ebe nia tenke

kumpri iha komunidade nia leet.

"PNTL involve direitamente halo mediasaun iha prevensaun konflitu komunitaria tanba prevensaun kriminalidade sai faktor importante iha estadu direitu demokratiku, ne'e la signifika katak medidas solusaun ne'ebe maka foti iha nivel suku hase'es tia sistema judisial maibe depende ba gravidade kazu saida maka atu lori ba sistema judisial atu resolve no kazu saida maka bele rejolve hamutuk ho autoridade iha nivel suku desde la viola regras no prinsipiu konstituisaun RDTL," dehan eis Komandante Jeral PNTL ne'e.

Polisia hatene oinsa atu interpreta ninia aktividade no prezensa iha komunidade nia le'et, alienede sai hanesan ninia filosofia ba Polisiamentu Komunitaria nia iha aktividade barak ne'ebe tenke garantia, asegura no presta ninia responsabilidade durante ninia estadia.

Iha okajaun ne'e Inspector Jeral PNTL Superintendent Xefe Carlos Jeronimo ne'ebe reprezenta Komandante Jeral hateten PNTL hein katak Fundasaun Asia nia analiza ba problema seguransa iha Timor-Leste bele kontribui ba dezenvolvimentu estratejiku ida ne'ebe adekuadu no nia rezolusaun tanba ne'e importante tebes, hein katak relatoriu ida ne'e bele fo benefisu ruma atu nune'e PNTL iha liña frete hodi bele manan konfiansa husi povu.

Inspector Jeral ne'e reforsa tan katak objektivu jeral husi Polisiamentu Komunitariu dezenvolve estratejia proximidade parseria no vizivilidade Polisiamentu Timor-Leste liu husi pilalar importante tolu hanesan Vizivilidade aas, Involvimento Komunidade no Profesionalismu hodi responde estratejia estadu konaba sidadania sivika no patriota.

Levantamento ne'ebe maka halao foka liu kona-ba problema Preokupasaun Seguransa No Krome, Persepsaun Kona-ba Inseguransa, Haksesuk Rai (Problema Disputa Rai), Violensia Domestika, Grupu Illegal Sira no Asesu ba Informasaun Seguransa.

Serimonia lansamentu ne'e partipa husi Ministru Interior Longuinhos Monteiro, Embaxador Nova Zelandia Vicky Poole, Komandante Polisia Komunitaria Superintendent Xefe Antonio da Luz, Komandante Operasaun Superintendent Natercia Martins, Kordenador Seguransa Gabinete Primeru Ministru, Komandante munisipiu, reprezentante Komunidade, Representante joventude, sosiedade civil, reprezentante Polisia Nova Zelandia no konvidadus sira.

PNTL Organiza Resensiamentu Eleitoral iha Uaibobo

Komandu Polisia Nasional Timor-Leste munisipiu Viqueque organiza resensiamentu eleitoral ba Komunidade suku Uaibobo postu administrativu Ossu munisipiu Viqueque nain 500 ne'ebe maka durante Restauraun Independensia seidauk rejistru no trata kartaun eleitoral hodi partisipa iha Eleisaun hodi ejerse sira nia direitu ba vota.

Hafoin prosesu dialogu lubuk ida ne'ebe maka Komandu Polisia Nasional Timor Leste (PNTL) Munisipiu Viqueque organiza iha tinan 2014 hamutuk ho Ministeriu Administrasau Estatal (MAE), Komisaun Nasional Eleisaun (CNE), Organisasau Não Govermental (ONG) no autoridade lokal konsolida no konvense duni komunidade suku Uaibobo hodi rejistru no emite (trata) kartaun eleitoral iha loron 11 fulan Outubru tinan 2016.

Komisariu Comisaun Nasional Eleisaun (CNE) José Belo hateten Kontaktu hirak ne'ebe maka halo hamutuk ho Komandu PNTL, Administrador munisipiu, autoridade lokal no kordenador CPD-RDTL hamosu rejultadu pojitivu hodi konvense duni komunidade Uaibobo ne'ebe maka durante ne'e izola aan no sira hotu konkorda atu rejista no trata kartaun Eleitoral nune'e sira bele partisipa iha prosesu Demokrasia liu husi eleisaun tanba partisipasaun sidaudaun hotu iha eleisaun importante.

Nia haktuir tan katak trata kartaun eleitoral ne'e tuir lei obrigatoriu maibe atu vota ne'e depende ema ida-idak atu hili ho nune'e Sekretariadu Tekniku Administrasau Eleitoral (STAE) halo rejistru ba komunidade membru Konsellu Popular Demokrátiku-Repúblika Demokrática Timor-Leste (CPD-RDTL) suku Uaibobo ho idade 17 ba leten hamutuk nain 500 hodi hetan kartaun eleitoral.

Hafoin rejista no emite kartaun eleitoral ba komunidade suku Uaibobo governu no instituisaun relevante sei esforu hodi halo komunikasaun no kontaktu ba komunidade iha munisipiu

seluk ne'ebe maka seidauk rejistru no emite kartaun eleitoral nune'e sira bele ejerse sira nia direitu ba vota iha eleisaun Suku, no Eleisaun Jeral iha tinan 2017.

Iha okajaun ne'e Komandante PNTL Munisipiu Viqueque Superintendente Antonino Mauluta hateten atu garante estabilidade no seguransa presiza kontribuisaun no partisipasaun sidaudaun hot-hotu tanba seguransa iha ita hotu nia liman nune'e tenke kaer metin unidade nasional hahu husi baze .

Atu garante Eleisaun Jeral iha tinan 2017 maka populasaun munisipiu Viqueque tenke sai exemplar no matadalau ba munisipiu seluk atu banati tuir hodi transforma munisipiu Viqueque ba futuru ne'ebe dezenvolvidu no diak liu, atu atinji mehi ida ne'e maka presija komunidade nia apoiu no koperasaun tanba siguransa nia baze iha komunidade tanba ne'e komunidade nia kontribuisaun no servisu hamutuk maka halo PNTL sai susesu.

Komandante PNTL munisipiu Viqueque ne'e husu ba komunidade Uaibobo atu servisu hamutuk ho Ofisial Polisia Suku (OPS) ne'ebe maka koloka iha suku ne'e hodi bele asegura seguransa no moris hakmatek ba komunidade nune'e wainhira mosu problema kiik ruma bele rezolve.

Atu konvense no konsolida povu eis Komandante munisipiu Covalima ne'e hasai moto ida katak povu maka masin-midar PNTL maka nehek tanba ne'e iha ne'ebe deit povu hela ba PNTL sempre buka tuir maske dok, area remotas no laihha asesu ba Estrada, eletrisidade no fasilitade publiku seluktanba ida ne'e maka devel autoridade seguransa nian.

Observasaun Media PNTL iha suku ne'e nota katak komunidade sira ho antusiasmua marka presensa iha sede CPD-RDTL no ofisialmente emite (trata) sira nia kartaun Eleitoral iha Autoridade CNE, STAE, PNTL no Autoridade lokal sira nian oin. Media PNTL.



Photo:Estevao Pereira/PNTL



Seminariu Kombate Krime Transnasional Iha Fronteira

"Hau bolu atensaun ba autoridade ezekutador Lei no komponente sira hotu tenke servisu hamutuk tanba instituisaun ida mesak susar atu kombate krime organizadu, koperasaun mutual entre Estadu no orgaun nasional importante atu halo prevensaun maximu ba karea sira ne'ebe tama mai ho natureza naok ou krime organizadu "

Longuinhos Monteiro
Ministru Interior

Photo:Jeremias dos Santos/PNTL

A tu kombate krime transnasional hanesan hatama veikulu aliu dalam ilegal no tráfiku humanu iha fronteira, Polisia Nasional Timor-Leste (PNTL) no Embaixada Republika Indonezia organiza seminari loron ida atu bele hametin kooperasaun no koordenasaun iha area seguransa.

Ministru Interior Longuinhos Monteiro hateten atu kombate krime transnasional iha fronteira instituisaun estadu tenke koopera ba malu tanba PNTL mesak deit labele halo buat ida tenke involve Imigrasaun, Alfandega, Diresaun Nasional Transporte Terrestre no inkluzivamente husi parte Polisia Republik Indonesia (POLRI) nune'e buka hatene tanba saida maka krime mosu, Nia hato'o kestaun ne'e iha Seminari Internasional kona-ba Krime Transnasional, Hatama Veikulu liu dalam Ilegal no Tráfiku Humanu iha Fronteira Indonezia no Timor-Leste, iha salaun Centru Convensaun Dili.

Nia realsa tan katak lei no sistema sei fraku tanba ne'e ezekutador lei husi parte Indonezia no Timor-Leste hamutuk iha ne'e buka solusaun, no husi parte governu ami prontu atu bele hadia sistema mesmu ke despaisu ministerial konjunta nian ka forma hotu ita bele halo hodi halo prevensaun ba krime iha fronteira.

Iha okajiaun ne'e Komandante Jeral PNTL Komisario Polisia Julio da Costa Hornay hateten Kauza krime transnasional akontese tanba ema sira ne'ebe maka hakarak hetan osan liu husi dalam ne'ebe lalos ho maneira oin-oin tanba ne'e parte seguransa tenke servisu makaas hodi halo prevensaun.

Entretantu Atase POLRI iha Timor-Leste I Made Pande Cakra hateten estadu Timor-Leste no Indonezia liu-liu ezekutador lei sira, presiza halo koresaun no hadia hamutuk aktividade iha fronteira liu-liu kona-ba tranzasaun motor no karreta ne'ebe tuij lei Indonezia nian katak illegal.

Iha fatin hanesan Kombes Pol Hary Sudwijanto iha ninia apresentasaun hateten Bazeia ba relatoriu POLDA Metro Jaya no Polresta Surabaya atividade naok motor iha Indonezia loron-loron sempre sae tanba fator ekonomia,

Ajente Rekruta PNTL 259 Simu Graduasaun

A tu kompleta efetivu ba servisu Instituisaun nian iha terenu, Komandu Polisia Nasional Timor Leste (PNTL) gradua tan Ajentes rekruta hamutuk na'in 259.

Ajentes Rekruta hirak ne'e, kompustu husi mane hamutuk na'in 256 no feto hamatuk 7 antes halo juramentu no simu graduasaun frekuenta sira nia Formasaun iha Centro Formasaun Polisia (CFP) Comoro durante fulan 9 nia laran hahu'u husi fulan Outubru 2015 to'o Jullu 2016.

Komandante Jerál PNTL Komisario Polisia Julio da Costa Hornay iha ninia diskursu hateten PNTL hanesan Instituisaun ida ne'ebe forte ne'e duni Ajentes Rekruta sira tenke prontu atu hasoru dezafiu saida deit maka sei mosu iha terenu.

"Juramentu ne'ebe imi halo laos atu sai deit hanesan formalidade ida, kada liafuan/frase ne'ebe imi hateten maibé iha ninia sentidu ba imi wainhira moris nu'udar polisia, juramentu ne'e reprezenta komprimisu atu defende interesse no valor Nasaun nian ne'ebe ass liu", hateten Komandante Jerál PNTL.

Komisario Polisia Julio da Costa Hornay afirma tan katak membru ajentes rekruta ne'ebe maka halo ona juramentu tenke tane ass interesse Nasaun no povu Timor Leste nian duke interesse pesoal ema ida-idak nian no apela ba graduadu sira atu hatudu komportamentu exemplar apartidariu (la mete iha partidu), no respeitu tomak ba prinsipiu ita nia Estadu Direitu Demokratiku, hodi kaer ba legalidade no tau aas direitus humanus.

"Ita hakarak atu ita nia sidadaun sira hare'e polisia ne'ebe respeita ba lei no ajente polisia ne'ebe bele proteje sidadaun no sai amigu ba ema hotu no mós iha kapasidade no kompetensia ne'ebe sai parte importante ba Estabilidade iha ita nia rain ne'e konstroj wainhira prezerva valores tolu ne'e: PAZ, SEGURANSA NO LIBERDADE", hatutan Komandante Jerál PNTL.

Kursu Formasaun ba Ajente ho nia finalidade atu forma Rekruta sira para iha koñesimentu no kompetensia teknika ne'ebe espesifikasi ba hala'o funsaun ne'ebe fó ba sira. Kursu Formasaun ba ajentes rekruta hirak ne'e hanesan kuartu Kursu ne'ebe realiza hodi atesta ba kualidade formasau no progresu ne'ebe desenvolve iha PNTL to'o mai ohin.

Komandante Jerál PNTL mós hato'o honra bo'ot no privelegio ba apoiu ne'ebe Guarda Nacional Republicana fó hanesan parseiru desenvolvimentu ba iha Susesu Kuartu Kursu Formasaun Ajentes.

Entertantu, Komandante CFP Superintendente Arquimino Ramos iha abertura serimonia ne'e hateten antes formasaun hahu'u iha total ema hamutuk na'in 263 maka tama iha Inkoporasaun maibé wainhira hahu'u Kursu Formasaun, kandidatu mane na'in ida resigna ann, na'in rua seluk tanba kestaun saude hodi la konsege tuij formasaun, nune'e sira ne'ebe maka konsege termina Kursu Formasaun hodi gradua hamutuk na'in 259.

"Prosesu atu muda mentalidade ema civil nian ba polisia presija sistema no politika Formasaun ida ne'ebe diak no relevante ho situaun, kondisaun ne'ebe Timor Leste iha", tenik Komandante CFP perante konvidadus no ajentes rekruta hamutuk ho familia sira.

Superintendente Arquimino Ramos akresenta tan katak Formasaun ba Polisia foun sira iha nivel Ajentes nu'udar Formasaun Prinsipal atu forma karakter no kompotensia ajentes polisia hodi servi no protege povu ne'ebe maka sira sei servi ba no iha sistema Formasaun ida ne'ebe adekuadu no iha kualidade hodi hari'i sai ema ne'ebe ho karakter nu'udar membru polisia ho ninia filosofia Polisia Komunitaria maibé ninia organizasaun, estrutura, formasau, disciplina identiku ho militar.

Partisipa iha serimonia ne'e Ministru Defesa Dr. Cerilo Cristovão, Duputadu Komisaun B Parlamentu Nasional Dr. David Dias Ximenes, Prokurador Jerál Repúblika Dr. José Ximenes, Segundo Komandante das F-FDTL Brigadeiru Jeneral Filomeno Paixão, Reitor UNTL, Parseiru PNTL no Ofisias Superiores, Subalternus, Ajentes inklui familia husi graduadus sira.



Photo:Tomas M. Rodrigues/PNTL



Memburu UPF Aprejenta Arma iha Loron Aniversario UPF ba Dala 13